

AMIL BULJUBAŠIĆ

Poštovani predsjedavajući, zamjenici predsjedavajućeg, kolege zastupnici, ministri, dragi gosti, mediji, pozdravljam sve prisutne. Danas postavljam jedno zastupničko pitanje. Ono se odnosi na predsjedavajućeg Skupštine i sekretara Skupštine. 01. decembra 2017. godine u Tešnju je održana centralna manifestacija obilježavanja 25 godišnjice Trećeg korpusa Armije Republike Bosne i Hercegovine kojoj su osim rukovodstva i članova Trećeg korpusa prisustvovala mnogobrojne zvanice i gosti. Među brojnim delegacijama koje su položile cvijeće na centralnom spomen obilježju šehidima i poginulim borcima bila je i delegacija Skupštine Zeničko-dobojskog kantona koju je predvodio predsjedavajući Skupštine, gospodin Jasmin Duvnjak. Pored predsjedavajućeg u delegaciji je bio i zastupnik Stranke demokratske akcije Ramo Pivić bez prisustva ijednog od predsjedavajućih Skupštine. Koristim priliku da se zahvalim delegaciji koja je tom prigodom posjetila općinu Tešanj i postavljam pitanje. Ko je i kada odlučio o sastavu delegacije koja će zvanično ispred Skupštine prisustvovati ovoj manifestaciji i položiti cvijeće na spomen obilježju? Da li je došlo do kršenja Poslovnika o radu Skupštine odnosno da li postoji akt kojim se definiše i ko i kako određuje sastav delegacija na takvim i sličnim manifestacijama? Mislim da ovo nije dobar primjer izgradnje zajedničke Bosne i Hercegovine na principima zakonitosti i ustavnosti, te se ... te da se ubuduće omogućiti učešće i drugim zastupnicima u zvaničnim delegacijama Skupštine Zeničko-dobojskog kantona. Zahvaljujem.

JASMIN DUVNJAK – predsjedavajući

Nema potrebe. Neka živi naša domovina Bosna i Hercegovina. S obzirom da vidimo da opasno ulazimo u predizbornu kampanju, kolega Buljubašiću ovakve stvari se postavljaju na kolegijalnoj razini, vrlo direktno, a ne ovako kao što ste Vi uradili. Ja ću Vam odgovoriti. Delegaciju Skupštine Zeničko-dobojskog kantona na obilježavanju Dana oružanih snaga i Trećeg korpusa Armije Republike Bosne i Hercegovine je predstavljao predsjedavajući Skupštine. Gospodin Pivić nije došao sa predsjedavajućim Skupštine i gospodin Pivić u tom smislu nije bio dio delegacije. Na licu mjesta ... s obzirom da je on došao, dakle, došao na lice mjesta o svom trošku, sa svojim prevozom, a ne sa predsjedavajućim i da je bio tu u momentu kad smo polagali cvijeće, pa možda Vam to izaziva neku nelagodu ili neku iritaciju, ali evo sad Vam otvoreno kažem. Dakle, predsjedavajući Skupštine Zeničko-dobojskog kantona je sam došao u Tešanj i predstavljao je Skupštinu Zeničko-dobojskog kantona s ponosom na obilježavanju Dana Armije Republike Bosne i Hercegovine, odnosno Trećeg korpusa i Oružanih snaga. Polahko kolega Buljubašiću, nemojte se uzrujavati. Druga stvar, pošto se dole na Jelah.infu pojavila neka informacija da smo došli uz policijsku pratnju. Dakle, da i to demantujem, ovako javno sa skupštinske govornice, kolega Buljubašiću. Očito da su krenule te predizborne podvale i te laži, gnjusne podvale i laži. Možda mi je sad jasnije odakle ... odakle idu s obzirom da mi nije bilo jasno kad su se pojavile na tom, ovaj, profilu odnosno portalu. Nikakvu pratnju policijsku, nikakvu policijsku svitu nije imala naša delegacija, ali je istina da pri ulasku u Tešanj apsolutno, dakle, ne tražeći i ne moleći ni zahtijevajući, ne koordinirajući, vjerovatno kao dobri domaćini Tešnjaci i policijska stanica i uprava u Tešnju su nekih 500-tinjak metara proveli određene delegacije, je li, ovaj, i sproveli do ... do parking mjesta, ovaj. Nikakvu mi nismo imali ni pratnju ni policijsku svitu niti to nama treba niti to ikad tražimo, na kraju krajeva može se takva stvar provjeriti u službenim policijskim zabilješkama. To je bila prilika dakle da i tu stvar razjasnimo, znate. Kolega Buljubašiću, kolega Buljubašiću, pitali ste i dobili ste odgovor. Delegaciju je predstavljao predsjedavajući a u delegaciji nije bio ni jedan zamjenik ni jedan poslanik. Na licu mjesta prilikom polaganja cvijeća oni koji su bili tu, koje smo, koje sam lično vidio, a ja sam došao na minut ili dva prije samog polaganja cvijeća s obzirom da je bio petak i džuma, dakle knap smo došli na to mjesto, ovaj, moguće da je se priključio i kolega kojeg ste Vi spomenuli, ali je žalosno ...

samo Vi dižite ruku, žalosno da na Danu Trećeg korpusa i Oružanih snaga sa ovako niskim politikanstvom idete to je žalosno i sramotno. I ako Vam je to adut pred predizbornu kampanju onda očekujte zaista, zaista velike rezultate i veliku spektakularnu pobjedu 07. oktobra naredne godine. Hvala.

AMIL BULJUBAŠIĆ

Ja ću samo dopuniti svoje pitanje. Ovako je ... ovo je klasičan primjer zloupotrebe govornice. Kad se postavi pitanje koje decidno i jasno ko je i kada odlučio o sastavu delegacije, a delegacija je najavljena kao ispred Skupštine Zeničko-dobojskog kantona. U toj delegaciji koja je odala počast šehidi ... koja je odala počast ... kažite mi ko je predstavio, ko je položio cvijeće? (poslanici govore s mjesta) Molim vas, možda vi jeste, ja sam za govornicom još uvijek.

JASMIN DUVNJAK – predsjedavajući

Pa, čovjek koristi teške teme. Kaže pazite kako gradimo državu Bosnu i Hercegovinu i onda koristi jednu totalnu insinuciju i podvalu.

AMIL BULJUBAŠIĆ

Ko je i kada odlučio o sastavu delegacije koja će zvanično ispred Skupštine Zeničko-dobojskog kantona prisustvovati ovoj manifestaciji i položiti cvijeće na spomen obilježju? Jedno. Da li je došlo do kršenja Poslovnika o radu Skupštine Zeničko-dobojskog kantona odnosno da li postoji akt kojim se definišu ... definiše ko i kako određuje sastav delegacija na takvim i sličnim manifestacijama? Molim Vas, vrlo tačno pitanje, precizno. Dajte mi, molim Vas, odgovor pismeno Vi i sekretar. Zahvaljujem.

JASMIN DUVNJAK – predsjedavajući

Dobro. Uredu. Uredu. Zahvaljujem. Zahvaljujem kolegi Buljubašiću. Zahvaljujem kolegi Buljubašiću. Mi smo dobili poziv kao Skupština. Došli smo, dakle. Ja sam predstavljao delegaciju. Ja sam došao jedini. Dakle, nije sa mnom kolega došao i nije bio sa mnom. Nije uopće sa skupštinskim autom došao kolega. Dakle, privatno je došao kolega. To je pod jedan. Pod broj dva, mi koliko je poznato, dakle, kad su u pitanju ovakve stvari kad dobije predsjedavajući poziv, naravno i zamjenici kad dobiju, kad imaju prostora i vremena zajedno mi učestvujemo u svim ovim protokolarnim stvarima. Mislim da ovakvo pitanje, za ovakav dan i za ovakvu prigodnju, gospodine Buljubašiću ste mogli pitati mene sasvim direktno i ako ne bi bili zadovoljni mojim odgovorom nikakav problem da sazovete press konferenciju, ja se ne bih ljutio, ali ja nisam ... pa naravno, ja sam dobio poziv i došao sam. Kolege zamjenici da su dobili i da su željeli, da su dobili poziv ... mi smo u korektnim komunikacijama i kontaktu i oni bi zasigurno i u slučaju potrebe za vozilom bili sa nama. I to nikakav problem nije. Nego mene, izvinjavam se, zaista jako frustrira da na ovakvim pitanjima uopće otvaramo ovakvu raspravu. Bio sam spreman za bilo kakav odgovor da ste me direktno pitali, a da ste nezadovoljni odgovorom da slobodno kritikujete i da sazovete i press konferenciju, ali sam malo ljut i frustriran da ipak na tako značajan dan idemo tako s nekim trivijalnim stvarima. Izvinjavam se, ali trivijalnim jer zaista delegaciju Kantona nisu predstavljali ostali i nisu bili ostali. Mislim na ... na ostale kolege, ali da je ... da je poziv došao na sve tri člana ja vjerujem da bi sve tri člana rukovodstva bila u Tešnju. Što se tiče ... to je tačno, pa to sam kazao. To sam vam odgovorio. Pridružio se ... I druga stvar, mi nemamo akt kojim se određuje ... nismo imali praksu ... nismo imali praksu vezano za ... za, ovaj, ustanovljavanje delegacija. Čini mi se da je profesor Lemeš sličnu stvar predložio. To je dobar prijedlog i mi ćemo u budućnosti uvesti praksu za takve vrste događaja da se utvrdi delegacija i to ne samo zbog mene zbog

svih i zamjenika i zbog ostalih, jer mislim da bi na takvim manifestacijama zaista bilo potrebno da smo što je više moguće nas da ih uveličamo. Odgovor ste dobili usmeno, a pismeno, neću dati pismeno. Zahvaljujem.